

四庫全書

史部

欽定四庫全書

通鑑紀事本末卷十八下

宋 袁樞 撰

赫連據朔方

晉安帝義熙三年 初魏王珪滅劉衛辰其子勃勃犇
秦秦高平公沒弈干以女妻之勃勃魁岸美容儀性辯
慧秦王興見而奇之與論軍國大事寵遇踰於勲舊興
弟邕諫曰勃勃不可近也興曰勃勃有濟世之才吾方

與之平天下奈何逆忌之乃以為安遠將軍使助沒奔
干鎮高平以三城朔方雜夷及衛辰部衆三萬配之使
伺魏間隙邕固爭以為不可興曰卿何以知其為人邕
曰勃勃奉上慢御衆殘貪猾不仁輕為去就寵之踰分
恐終為邊患興乃止久之竟以勃勃為安北將軍五原
公配以三交五部鮮卑及雜虜二萬餘落鎮朔方魏主
珪歸所虜秦將唐小方于秦秦王興請歸賀狄干仍送
良馬千匹以贖狄伯支珪許之勃勃聞秦復與魏通而

怒乃謀叛秦柔然可汗社論獻馬八千匹於秦至大城
勃勃掠取之悉集其衆三萬餘人僞畋於高平川因襲
殺沒奕干而并其衆勃勃自謂夏后氏之苗裔六月自
稱大夏天王大單于大赦改元龍升置百官 初魏主
珪遣北部大人賀狄干獻馬千匹求昏於秦秦王興止
狄干而絕其昏於是秦魏有隙秦王興遣尚書右僕射
狄伯支等伐魏魏主珪自將大軍擊之敗狄伯支及趙
騎校尉唐小方等 冬十月夏王勃勃破鮮卑薛干等

三部降其衆以萬數進攻秦三城已北諸戍斬秦將楊丕姚石生等諸將皆曰陛下欲經營關中宜先固根本使人心有所憑係高平山川險固土田饒沃可以定都勃勃曰卿知其一未知其二吾大業草創士衆未多姚興亦一時之雄諸將用命關中未可圖也我今專固一城彼必并力於我衆非其敵亡可立待不如以驍騎風馳出其不意救前則擊後救後則擊前使彼疲於奔命我則游食自若不及十年嶺北河東盡為我有待興既

死嗣子闇弱徐取長安在吾計中矣於是侵掠嶺北嶺北諸城門不晝啓興乃嘆曰吾不用黃兒之言以至于此十一月勃勃又敗秦將張佛生于青石原俘斬五千餘人

四年夏五月秦王興使左僕射齊難帥騎二萬討勃勃秋七月夏王勃勃聞秦兵且至退保河曲齊難以勃勃既遠縱兵野掠勃勃潛師襲之俘斬七千餘人難引兵退走勃勃追至木城禽之虜其將士萬三千人於是

嶺北夷夏附於勃勃者以萬數勃勃皆置守宰以撫之
五年春正月秦王興遣其弟平北將軍沖征虜將軍狄
伯支等帥騎四萬擊夏王勃勃沖至嶺北謀還襲長安
伯支不從而止醢殺伯支以滅口 夏四月夏王勃勃
帥騎二萬攻秦掠取平涼雜胡七千餘戶進屯依力川
秋九月秦王興自將擊夏王勃勃至貳城遣安遠將軍
姚詳等分督租運勃勃垂虛奄至興懼欲輕騎就詳等
右僕射韋華曰若鑒興一動衆心駭懼必不戰自潰詳

營亦未必可至也與與勃勃戰秦兵大敗將軍姚榆生
為勃勃所禽左將軍姚文宗等力戰勃勃乃退興還長
安勃勃復攻秦敕竒堡黃石固我羅城皆拔之徙七千
餘家於大城以其丞相右地代領幽州牧以鎮之

六年春三月夏王勃勃遣尚書胡金纂攻平涼秦王興救
平涼擊金纂殺之勃勃又遣兄子左將軍羅提攻拔定
陽阬將士四千餘人秦將曹熾曹雲王肆佛等各

千戶內徙興處之湟山及陳倉勃勃寇隴右破白崖堡

遂趣清水略陽太守姚壽都棄城走勃勃徙其民萬六千戶於大城興自安定追之至壽渠川不及而還

七年春正月秦姚詳屯杏城為夏王勃勃所逼南奔大蘓勃勃遣平東將軍鹿奕干追斬之盡俘其眾勃勃南攻安定破尚書楊佛嵩于青石北原降其眾四萬五千進攻東鄉下之徙三千餘戶于貳城秦鎮北參軍王買德奔夏夏王勃勃問以滅秦之策買德曰秦德雖衰藩鎮猶固願且蓄力以待之勃勃以買德為軍師中郎將

秦王興遣衛大將軍常山公顯迎姚詳弗及遂屯杏城

八年冬十月秦王興以楊佛嵩為雍州刺史帥嶺北見
兵以擊夏行數日興謂羣臣曰佛嵩每見敵勇不自制
吾常節其兵不過五千人今所將既多遇敵必敗行已
遠追之無及將若之何佛嵩與夏王勃勃戰果敗為勃
勃所執絕亢而死

九年春三月夏王勃勃大赦改元鳳翔以叱干阿利領
將作大匠發嶺北夷夏十萬人築都城於朔方水北黑

水之南勃勃曰朕方統一天下君臨萬邦宜名新城曰
統萬阿利性巧而殘忍蒸土築城錐入一寸即殺作者
而并築之勃勃以為忠委任之凡造兵器成呈之工人
必有死者射甲不入則斬弓人入則斬甲匠又鑄為一
大鼓飛廉翁仲銅鉈龍虎之屬飾以黃金列於宮殿之
前凡殺工匠數千由是器物皆精利勃勃自謂其祖從
母姓為劉非禮也古人氏族無常乃改姓赫連氏言帝
王係天為子其徽赫與天連也其非正統者皆以鐵伐

為氏言其剛銳如鐵皆堪伐人也

十一年春三月夏王勃勃攻秦杏城拔之執守將姚達
阮士卒二萬人秦王興如北地遣廣平公弼及輔國將
軍斂曼嵬向新平興還長安 秋九月夏赫連建將兵
擊秦執平涼太守姚周都遂入新平廣平公弼與戰於
龍尾堡禽之

十二年春正月秦王興卒太子泓即皇帝位大赦改元
永和 夏六月夏王勃勃帥騎四萬襲上邽未至嵩與

盛戰於竹嶺敗死勃勃攻上邽二旬克之殺秦州刺史姚軍都及將士五千餘人因毀其城進攻陰密又殺秦將姚良子及將士萬餘人以其子昌為雍州刺史鎮陰密征北將軍姚恢棄安定奔還長安安定人胡儼等帥戶五萬據城降於夏勃勃使鎮東將軍羊苟兒將鮮卑五千鎮安定進攻秦鎮西將軍姚謏于雍城謏委鎮并長安勃勃據雍進掠郿城秦東平公紹及征虜將軍尹昭等將步騎五萬擊之勃勃退趨安定胡儼閉門拒之

殺羊苟兒及所將鮮卑復以安定降秦紹進擊勃勃於馬鞍阪破之追至朝那不及而還勃勃歸杏城楊盛復遣兄子僊擊秦至陳倉秦歛曼嵬擊却之夏王勃勃復遣兄子提南侵洩陽秦車騎將軍姚裕等擊却之

十三年夏王勃勃聞太尉裕伐秦乃進據安定秦嶺北郡縣鎮戍皆降之太尉裕克秦東還留次子桂陽公義真為都督夏王勃勃聞太尉裕東還乃以其子撫軍大將軍瓚都督前鋒諸軍事帥騎二萬向長安

十四年夏赫連瓚至渭龍驤將軍沈田子將兵拒之田
子殺王鎮惡王修執田子斬之以冠軍將軍毛修之代
鎮惡傳弘之大破慕容瓚夏兵乃退劉義真召外軍入
長安關中郡縣悉降于夏夏王勃勃進據咸陽宋公裕
召義真東歸以相國右司馬朱齡石代鎮長安義真將
士大掠而東赫連瓚帥衆追之傳弘之等力戰晉兵大
敗夏兵不窮追故得免長安百姓逐朱齡石齡石犇潼
關勃勃入長安

五事并見劉裕滅後秦

夏王勃勃築壇于灊上即

皇帝位改元昌武

恭帝元熙元年春二月夏羣臣請都長安勃勃曰朕豈不知長安歷世帝王之都沃饒險固然晉人僻遠終不能為吾患魏與我風俗略同土壤隣接自統萬距魏境裁百餘里朕在長安統萬必危若在統萬魏必不敢濟河而西諸卿適未見此耳皆曰非所及也乃於長安置南臺以赫連瓚領大將軍雍州牧錄南臺尚書事勃勃還統萬大赦改元真興勃勃性驕虐視民如草芥常居

城上置弓劍於側有所嫌忿手自殺之羣臣迂視者鑿其目笑者決其唇諫者先截其舌然後斬之

魏滅北燕

晉安帝義熙十年秋八月辛丑魏主嗣遣謁者于什門使於燕于什門至和龍不肯入見曰大魏皇帝有詔須馮王出受然後敢入燕王跋使人牽逼令入什門見跋不拜跋使人按其項什門曰馮王拜受詔吾自以賓主致敬何苦見逼邪跋怒留什門不遣什門數衆辱之左

右請殺之跋曰彼各為其主耳乃幽執什門欲降之什門終不降久之衣冠弊壞略盡蟣虱流溢跋遺之衣冠什門皆不受

十四年 初和龍有赤氣四塞蔽日自寅至申燕太史令張穆言於燕王跋曰此兵氣也今魏方彊盛而執其使者好命不通臣竊懼焉跋曰吾方思之五月魏主嗣東巡至濡源及甘松遣征東將軍長孫道生安東將軍李先給事黃門侍郎奚觀帥精騎二萬襲燕又命驍騎

將軍延普幽州刺史尉諾自幽州引兵趨遼西為之聲
勢嗣屯突門嶺以得之道生等拔乙連城進攻和龍與
燕單于右輔古泥戰破之殺其將皇甫軌燕王跋嬰城
自守魏人攻之不克掠其民萬餘家而還

宋文帝元嘉三年秋八月燕太子永卒立次于翼為太
子

七年秋八月燕太祖寢疾召中書監申秀侍中陽哲於
內殿屬以後事九月病甚輦而臨軒命太子翼攝國事

勒兵聽政以備非常宋夫人欲立其子受居惡翼聽政
謂翼曰上疾將瘳奈何遽欲代父臨天下乎翼性仁弱
遂還東宮日三往省疾宋夫人矯詔絕內外遣閤寺傳
問而已翼及諸子大臣並不得見唯中給事胡福獨得
出入專掌禁衛福慮宋夫人遂成其謀乃言於司徒錄
尚書事中山公弘弘與壯士數十人被甲入禁中宿衛
皆不戰而散宋夫人命閉東閤弘家僮庫斗頭勁捷有
勇力踰閤而入至于皇堂射殺女御一人太祖驚懼而

殂弘遂即天王位遣人巡城告曰天降凶禍大行崩背
太子不侍疾羣公不犇喪疑有逆謀社稷將危吾備介
弟之親遂攝大位以寧國家百官叩門入者進階二等
太子翼帥東宮兵出戰而敗兵皆潰去弘遣使賜翼死
太祖有子百餘人弘皆殺之諡太祖曰文成皇帝葬長
谷陵

九年春正月立慕容后之子王仁為太子 夏五月魏
主治兵於南郊謀伐燕 六月庚寅魏主伐燕命太子

晃錄尚書事時晃纔五歲 秋七月己未魏主之濡水
庚申遣安東將軍奚斤發幽州民及密雲丁零萬餘人
運攻具出南道會和龍魏主至遼西燕王遣其侍御史
崔聘奉牛酒犒師己巳魏主至和龍 燕石城太守李
崇等十郡降於魏魏發其民三萬穿圍塹以守和龍崇
績之子也八月燕王使數萬人出戰魏昌黎公丘等擊
破之死者萬餘人燕尚書高紹帥萬餘家保羌胡固辛
己魏主攻紹斬之平東將軍賀多羅攻帶方撫軍大將

軍永昌王健攻建德驃騎大將軍樂平王丕攻冀陽皆拔之九月乙卯魏主引兵西還徙營丘成周遼東樂浪帶方玄菟六郡民三萬家於幽州燕尚書郭淵勸燕王送款獻女於魏乞為附庸燕王曰負賾在前結怨已深降附取死不如守志更圖也魏主之圍和龍也宿衛之士多在戰陳行宮人少雲中鎮將朱修之謀與南人襲殺魏主因入和龍浮海南歸以告冠軍將軍毛修之毛修之不從乃止既而事泄朱修之逃奔燕魏人數伐燕

燕王遣修之南歸求救修之汎海至東萊遂還建康拜
黃門侍郎 初燕王嫡妃王氏生長樂公崇崇於兄弟
為最長及即位立慕容氏為皇后王氏不得立又黜崇
使鎮肥如崇母弟廣平公朗樂陵公邈相謂曰今國家
將亡人無愚智皆知之王復受慕容后之譖吾兄弟死
無日矣乃相與亡犇遼西說崇使降魏崇從之會魏主
使給事郎王德招崇十二月己丑崇使邈如魏請舉郤
降燕王聞之使其將封羽圍崇於遼西

十年春正月乙卯魏主遣永昌王健督諸軍救遼西

二月庚午魏主以馮崇為都督幽平東夷諸軍事車騎
大將軍幽平二州牧封遼西王錄其國尚書事食遼西
十郡承制假授尚書刺史征虜已下官 夏六月魏永
昌王健左僕射安原督諸軍擊和龍將軍樓勃將五千
騎圍凡城燕守將封羽以凡城降收其三千餘家而還
秋八月馮崇上表請說降其父魏主不聽

十一年春正月戊戌燕王遣使請和於魏魏主不許

閏三月辛巳燕王遣尚書高顥上表稱藩請罪于魏乞
以季女充掖庭魏主乃許之徵其太子王仁入朝燕王
送魏使者于什門還平城什門在燕二十一年不屈節
魏主下詔褒稱以比蘓武拜治書御史 夏六月燕王
不遣太子質魏散騎常侍劉滋諫曰昔劉禪有重山之
險孫皓有長江之阻皆為晉擒何則疆弱之勢異也今
吾弱於吳蜀而魏彊於晉不從其欲將有危亡之禍願
亟遣太子而修政事撫百姓收離散賑飢窮勸農桑省

賦役社稷猶庶幾可保燕王怒殺之辛亥魏主遣撫軍大將軍永昌王健等伐燕收其禾稼徙民而還

十二年春正月燕王數為魏所攻遣使詣建康稱藩奉貢癸酉詔封為燕王江南謂之黃龍國三月癸亥燕

王遣大將湯燭入貢於魏辭以太子王仁有疾故未之遣夏六月戊申魏主命驃騎大將軍樂平王丕鎮東大將軍徒河屈垣等帥騎四萬伐燕秋七月己卯魏樂平王丕等至和龍燕王以牛酒犒軍獻甲三千屈垣

責其不送侍子掠男女六千口而還 冬十一月魏人
數伐燕燕日危虜上下憂懼太常楊嶠復勸燕王速遣
太子入侍燕王曰吾未忍為此若事急且東依高麗以
圖後舉嶠曰魏舉天下以擊一隅理無不克高麗無信
始雖相親終恐為變燕王不聽密遣尚書陽伊請迎於
高麗

十三年春二月戊子燕王遣使入貢於魏請送侍子魏
主不許將舉兵討之壬辰遣使者十餘輩詣東方高麗

等諸國告諭之 三月辛未魏平東將軍娥清安西將
軍古弼將精騎一萬伐燕平州刺史拓拔嬰帥遼西諸
軍會之 夏四月魏娥清古弼攻燕白狼城克之高麗
遣其將葛盧孟光將衆數萬隨陽伊至和龍迎燕王高
麗屯於臨川燕尚書令郭生因民之憚遷開城門納魏
兵魏人疑之不入生遂勒兵攻燕王王引高麗兵入自
東門與生戰於闕下生中流矢死葛盧孟光入城命軍
士脫弊褐取燕武庫精仗以給之大掠城中五月乙卯

燕王帥龍城見戶東徙焚宮殿火一旬不滅令婦人被
甲居中陽伊等勒精兵居外葛盧孟光帥騎殿後方軌
而進前後八十餘里古弼部將高苟子帥騎欲追之弼
醉拔刀止之故燕王得逃去魏主聞之怒檻車徵弼及
娥清至平城皆黜為門卒戊午魏主遣散騎常侍封撥
使高麗令送燕王 秋九月高麗不送燕王於魏遣使
奉表稱當與馮弘俱奉王化魏主以高麗違詔議擊之
將發隴右騎卒劉絜曰秦隴新民且當優復俟其饒實

然後用之樂平王丕曰和龍新定宜廣修農桑以豐軍實然後進取則高麗一舉可滅也魏主乃止

十五年 初燕王弘至遼東高麗王璉遣使勞之曰龍城王馮君爰適野次士馬勞乎弘慙怒稱制讓之高麗處之平郭尋徙北豐弘素侮高麗政刑賞罰猶如其國高麗乃奪其侍人取其太子王仁為質弘怨高麗遣使來上表求迎上遣使者王白駒等迎之并令高麗資遣高麗王不欲使弘南來遣將孫澈高仇等殺弘于北豐

并其子孫十餘人諡弘曰昭成皇帝

魏滅夏

宋文帝元嘉元年夏主將廢太子瓚而立少子酒泉公倫瓚聞之將兵七萬北伐倫倫將騎三萬拒之戰于高平倫敗死倫兄太原公昌將騎一萬襲瓚殺之并其衆八萬五千歸于統萬夏主大悅立昌為太子夏主好自矜大名其四門東曰招魏南曰朝宋西曰服涼北曰平

朔

二年秋八月夏武烈帝殂廟號世祖太子昌即皇帝位
大赦改元承光

三年夏六月魏主詔問公卿今當用兵赫連蠕蠕二國
何先長孫嵩長孫翰奚斤皆曰赫連土著未能為患不
如先伐蠕蠕太常崔浩曰赫連氏土地不過千里政刑
殘虐人神所棄宜先伐之尚書劉絜武京侯安原請先
伐燕於是魏主自雲中西巡至五原因略於陰山東至
和兇山秋八月還平城 秋九月魏主聞夏世祖殂諸

子相圖國人不安欲伐之長孫嵩等皆曰彼若城守以逸待勞大檀聞之乘虛入寇此危道也崔浩曰往年以來熒惑再守羽林鉤已而行其占秦亡今年五星并出東方利以西伐天人相應不可失也嵩固爭之帝大怒責嵩在官貪污命武士頓辱之於是遣司空奚斤帥四萬五千人襲蒲阪宋兵將軍周幾帥萬人襲陝城以河東太守薛謹為鄉導謹辨之子也魏主欲以中書博士平棘李順總前驅之兵訪於崔浩浩曰順誠有籌略然

臣與之婚姻深知其為人果於去就不可專委帝乃止
冬十月丁巳魏主發平城魏主行至君子津會天暴
寒冰合十一月戊寅帥輕騎二萬濟河襲統萬壬午
冬至夏主方燕羣臣魏師奄至上下驚擾魏主軍於黑
水去城三十餘里夏主出戰而敗退走入城門未及閉
門三郎豆代田帥衆乘勝入西宮焚其西門宮門閉代
田踰宮垣而出魏主拜代田勇武將軍魏軍夜宿城北
癸未分兵四掠殺獲數萬魏主謂諸將曰統萬未可得

也它年當與卿等取之乃徙其民萬餘家而還夏弘農
太守曹達聞周幾將至不戰而走魏師乘勝長驅遂入
三輔會幾卒于雲中蒲坂守將軍平公乙斗聞奚斤將
至遣使詣統萬告急使者至統萬魏軍已圍其城還告
乙斗曰統萬已敗矣乙斗懼棄城西犇長安斤遂克蒲
坂夏主之弟助興先守長安乙斗至與助興棄長安西
犇安定十二月斤入長安

四年春正月乙酉魏主還平城統萬徙民在道多死能

至平城者什纔六七已亥魏主如幽州夏主弟平原公
定帥衆二萬向長安魏主聞之伐木陰山大造攻具再
謀伐夏 二月魏主還平城 三月丙子魏主遣高涼
王禮鎮長安禮斤之孫也又詔執金吾桓貸造橋於君
子津 夏四月魏奚斤與夏平原公定相持於長安魏
主欲乘虛伐統萬簡兵練士部分諸將命司徒長孫翰
等將三萬騎為前驅常山王素等將步兵三萬為後繼
南陽王伏真等將步兵三萬部送攻具將軍賀多羅將

精騎三千為前候素遵之子也五月魏主發平城命龍驤將軍代人陸俟督諸軍鎮大磧以備柔然辛巳濟君子津魏主至拔鄰山築城捨輜重以輕騎三萬倍道先行羣臣咸諫曰統萬城堅非朝夕可拔今輕軍討之進不可克退無所資不若與步兵攻具一時俱往帝曰用兵之術攻城最下必不得已然後用之今以步兵攻具皆進彼必懼而堅守若攻不時拔食盡兵疲外無所掠進退無地不如以輕騎直抵其城彼見步兵未至意

必寬弛吾羸形以誘之彼或出戰則成擒矣所以然者
吾之軍士去家二千餘里又隔大河所謂置之死地而
後生者也故以之攻城則不足決戰則有餘矣遂行

六月魏主至統萬分軍伏於深谷以少衆至城下夏將
狄子玉降魏言夏主聞有魏師遣使召平原公定定曰
統萬堅峻未易攻拔待我擒奚斤然後徐徃內外擊之
蔑不濟矣故夏主堅守以待之魏主患之乃退軍以示
弱遣娥清及永昌王健帥騎五千西掠居民魏軍士有

得罪亡犇夏者言魏軍糧盡士卒食菜輜重在後步兵未至宜急擊之夏主從之甲辰將步騎三萬出城長孫翰等皆言夏兵步陳難陷宜避其鋒魏主曰吾遠來求賊唯恐不出今既出矣乃避而不擊彼奮我弱非計也遂收衆偽遁引而疲之夏兵爲兩翼鼓譟追之行五六里會有風雨從東南來揚沙冥晦官者趙倪頗曉方術言於魏主曰今風雨從賊上來我向之彼背之天不助人且將士飢溺願陛下攝騎避之更待後日崔浩叱之

曰是何言也吾千里制勝一日之事豈得變易賊貪進不止後軍已絕宜隱軍分出奮擊不意風道在人豈有常也魏主曰善乃分騎為左右隊以掎之魏主馬蹶而墜幾為夏將所獲拓跋齊以身捍蔽決死力戰夏兵乃退魏主騰馬得上刺夏尚書斛黎文殺之又殺騎兵十餘人身中流矢奮擊不輟夏衆大潰齊翳槐之玄孫也魏人乘勝逐夏主至北城殺夏主之弟河南公滿及兄子蒙遜死者萬餘人夏主不及入城遂奔上邽魏主微

服逐犇者入其城拓跋齊固諫不聽夏人覺之諸門悉
閉魏主因與齊等入其宮中得婦人裙繫之槩上魏主
乘之而上僅乃得免會日暮夏尚書僕射問至奉夏主
之母出走長孫翰將八千騎追夏主至高平不及而還
已已魏主入城獲夏主公卿將校及諸母后妃姊妹宮人
以萬數馬三十餘萬匹牛羊數千萬頭府庫珍寶車旗
器物不可勝計頒賜將士有差初夏世祖奢侈築統萬
城高十仞基厚三十步上廣十步宮牆高五仞其堅可

以厲刀斧臺榭壯大皆彫鏤圖畫被以綺繡窮極文采
魏主顧謂左右曰蕞爾國而用民如此欲不亡得乎得
夏太史令張淵徐辯復以為太史令得故晉將毛修之
秦將軍庫洛千歸庫洛千於秦以毛修之善烹調用為
太官令魏主見夏著作郎天水趙逸所為文譽夏主太
過怒曰此豎無道何敢如是誰所為邪當速推之崔浩
曰文士褒貶多過其實蓋不得已不足罪也乃止魏主
納夏世祖三女為貴人奚斤與夏平原公定猶相拒於

長安魏主命宗正娥清太僕丘堆帥騎五千略地關右
定聞統萬已破遂奔上邽斤追至雍不及而還清堆攻
夏貳城拔之魏主詔斤等班師斤上疏言赫連昌亡保
上邽鳩合餘燼未有蟠據之資今因其危滅之為易請
益鎧馬平昌而還魏主不許斤固請乃許之給斤兵萬
人遣將軍劉拔送馬三千匹并留娥清丘堆使共擊夏
辛酉魏主自統萬東還以常山王素為征南大將軍假
節與執金吾桓貸莫雲留鎮統萬雲題之弟也

五年春二月魏平北將軍尉眷攻夏主於上邽夏主退屯平涼奚斤進軍安定與丘堆娥清軍合斤馬多疫死士卒乏糧乃深壘自固遣丘堆督租於民間士卒暴掠不設儆備夏主襲之堆兵敗以數百騎還城夏主乘勝日來城下鈔掠不得芻牧諸將患之監軍侍御史安頡曰受詔滅賊今更為賊所困退守窮城若不為賊殺當坐法誅進退皆無生理而諸王公晏然曾不為計乎斤曰今軍士無馬以步擊騎必無勝理當須京師救騎至

合擊之頡曰今猛寇逋逸於外吾兵疲食盡不一決戰則死在旦夕救騎何可待乎等於就死死戰不亦可乎斤又以馬少為辭頡曰今斂諸將所乘馬可得二百匹頡請募敢死之士出擊之就不能破敵亦可以折其銳且赫連昌狃而無謀好勇而輕每自出挑戰衆皆識之若伏兵掩擊昌可禽也斤猶難之頡乃陰與尉眷等謀選騎待之既而夏主來攻城頡出應之夏主自出陳前搏戰軍士識其貌爭赴之會天大風揚塵晝昏夏主敗

走頡追之夏主馬蹶而墜遂擒之頡同之子也夏大將軍領司徒平原王定收其餘衆數萬奔還平涼即皇帝位大赦改元勝光三月辛巳赫連昌至平城魏主館之於西宮門內器用皆給乘輿之副又以妹始平公主妻之假常忠將軍賜爵會稽公以安頡為建節將軍賜爵西平公尉眷為寧北將軍進爵漁陽公魏主常使赫連昌侍從左右與之單騎共逐鹿深入山澗昌素有勇名諸將咸以為不可魏主曰天命有在亦何所懼親遇如

初奚斤自以為元帥而昌為偏裨所擒深恥之乃捨其輜重齎三日糧追夏主於平涼娥清欲循水而往斤不從自北道邀其走路至馬鬣嶺夏軍將遁會魏小將有罪亡歸於夏告以魏軍食少無水夏主乃分兵邀斤前後夾擊之魏兵大潰斤及娥清劉拔皆為夏所擒士卒死者六七千人丘堆守輜重在安定聞斤敗棄輜重奔長安與高涼王禮偕奔蒲坂夏人復取長安魏主大怒命安頡斬丘堆代將其眾鎮蒲坂以拒之夏四月夏

主遣使請和於魏魏主以詔諭之使降

六年春正月夏酒泉公雋自平涼犇魏 夏五月夏主

欲復取統萬引兵東至侯尼城不敢進而還夏主少凶
暴無賴不為世祖所知十月畋于陰槃登苛藍山望統
萬城泣曰先帝若以朕承大業者豈有今日之事乎

七年春三月壬寅魏封赫連昌為秦王 秋九月夏主
遣其弟謂以代伐魏鄜城魏平西將軍始平公隗歸等
擊之殺萬餘人謂以代遁去夏主自將數萬人邀擊隗

歸於鄆城東留其弟上谷公社干廣陽公度洛孤守平涼遣使來求和約合兵滅魏遙分河北自恒山以東屬宋以西屬夏魏主聞之治兵將伐夏羣臣咸曰劉義隆兵猶在河中捨之西行前寇未可必克而義隆乘虛濟河則失山東矣魏主以問崔浩對曰義隆與赫連定遙相招引以虛聲唱和共窺大國義隆望定進定待義隆前皆莫敢先入譬如連雞不得俱飛無能為害也赫連定殘根易摧擬之必仆克定之後東出潼關席卷而前

則威振南極江淮以北無立草矣聖策獨發非愚近所
及願陛下勿疑魏主如統萬遂襲平涼以衛兵將軍王
斤鎮蒲坂冬十一月乙酉魏主至平涼夏上谷公社
干等嬰城固守魏主使赫連昌招之不下乃使安西將
軍古弼等將兵趣安定夏主自鄜城還安定將步騎二
萬北救平涼與弼遇弼偽退以誘之夏主追之魏主使
高車馳擊之夏兵大敗斬首數千級夏主還走登鶻觚
原為方陳以自固魏兵就圍之魏軍圍夏主數日斲

其水草人馬飢渴丁酉夏主引衆下鶉觚原魏武衛將
軍丘眷擊之夏衆大潰死者萬餘人夏主中重創單騎
走收其餘衆驅民五萬西保上邽魏人獲夏主之弟丹
楊公烏視拔武陵公禿骨及公侯以下百餘人是日魏
兵乘勝進攻安定夏東平公乙斗棄城奔長安驅略數
千家西奔上邽 己亥魏主如安定庚子還臨平涼掘
塹圍之安慰初附赦秦雍之民賜復七年夏隴西守將降魏
十二月丁卯夏上谷公社干廣陽公度洛孤出降魏

克平涼關中侯豆代田得奚斤娥清等獻於魏主魏主以夏主之后賜代田命斤膝行執酒以奉代田謂斤曰全汝生者代田也賜代田爵并陞侯加散騎常侍右衛將軍領內都幢將夏長安臨晉武功守將皆走關中悉入於魏魏主留巴東公延普鎮安定以鎮西將軍王斤鎮長安壬申魏主東還以奚斤為宰士使負酒食以從王斤驕矜不法信用左右調役百姓民不堪命南奔漢川者數千家魏主案治得實斬斤以徇

八年夏六月夏主畏魏人之逼擁秦民十餘萬口自治城濟河欲擊河西王蒙遜而奪其地吐谷渾王慕瓚遣益州刺史慕利延寧州刺史拾虔帥騎三萬乘其半濟邀擊之執夏主定以歸 秋八月吐谷渾王慕瓚遣侍郎謝太寧奉表于魏請送赫連定

九年春三月壬申吐谷渾王慕瓚送赫連定于魏魏人殺之

十一年春閏三月甲戌赫連昌叛魏西走丙子河西侯

將格殺之魏人并其羣弟誅之

魏滅北涼

宋文帝元嘉七年冬十一月河西王蒙遜遣尚書郎宗舒等入貢于魏魏主與之宴執崔浩之手以示舒等曰汝所聞崔公此則是也才略之美於今無比朕動止咨之豫陳成敗若合符契未嘗失也

八年秋八月乙酉河西王蒙遜遣子安周入侍于魏

九月魏主欲選使者詣河西崔浩薦尚書李順乃以順

為太常拜河西王蒙遜為侍中都督涼州西域羌戎諸
軍事太傅行征西大將軍涼州牧涼王王武威張掖敦
煌酒泉西海金城西平七郡冊曰盛衰存亡與魏升降
北盡窮髮南極庸嶠西被崑嶺東至河西王實征之以
夾輔皇室置將相羣卿百官承制假授建天子旌旗出
入警蹕如漢初諸侯王故事

元年冬十二月魏李順復奉使至涼涼王蒙遜遣中兵
校郎楊定歸謂順曰年衰多疾腰髀不隨不堪拜伏比

三五日消息小差當相見順曰王之老疾朝廷所知豈得自安不見詔使明日蒙遜延順入至庭中蒙遜箕坐隱几無動起之狀順正色入言曰不謂此叟無禮乃至於此今不憂覆亡而敢陵侮天地魂魄逝矣何用見之握節將出涼王使定歸追止之曰太常既雅恕衰疾傳聞朝廷有不拜之詔是以敢自安耳順曰齊桓公九合諸侯一匡天下周天子賜胙命無下拜桓公猶不敢失臣禮下拜登受今王雖功高未如齊桓朝廷雖相崇重

未有不拜之詔而遽自偃蹇此豈社稷之福邪蒙遜乃起拜受詔使還魏主問以涼事順曰蒙遜控制河右踰二十年經涉艱難粗識機變綏集荒裔羣下畏服雖不能貽厥孫謀猶足以終其一世然禮者德之與敬者身之基也蒙遜無禮不敬以臣觀之不復年矣魏主曰易世之後何時當滅順曰蒙遜諸子臣略見之皆庸才也如聞敦煌太守牧犍器性粗立繼蒙遜者必此人也然比之於父皆云不及此殆天之所以資聖明也魏主曰

朕方有事東方未暇西略如卿所言不為晚也初蜀賓沙門曇無讖自云能使鬼治病且有祕術涼王蒙遜甚重之謂之聖人諸女及子婦皆往受術魏主聞之使李順往徵之蒙遜留不遣仍殺之魏主由是怒涼蒙遜荒淫猜虐羣下苦之

十年夏四月涼王蒙遜病甚國人共議以世子菩提幼弱立菩提之兄敦煌太守牧犍為世子加中外都督大將軍錄尚書事蒙遜卒諡曰武宣王廟號太祖牧犍即河

西王位大赦改元永和立子封檀為世子加撫軍大將軍
錄尚書事遣使請命于魏牧犍聰穎好學和雅有度量
故國人立之先是魏主遣李順迎武宣王女為夫人會
牧犍稱先王遺意遣左丞宋繇送其妹興平公主于魏
拜右昭儀魏主謂李順曰卿言蒙遜今則驗矣又言牧
犍立何其妙哉朕克涼州亦當不遠於是賜絹十匹廐
馬一乘進號安西將軍寵待彌厚政事無巨細皆與之
參議遣順拜牧犍都督涼沙河三州西域羌戎諸軍事

車騎將軍開府儀同三司涼州刺史河西王以宋繇為河西王右相牧犍以無功受賞留順上表乞安平一號優詔不許牧犍尊敦煌劉昫為國師親拜之命官屬以下皆北面受業

十一年夏四月河西王牧犍遣使上表告嗣位戊寅詔以牧犍為都督涼秦等四州諸軍事征西大將軍涼州刺史河西王

十二年春正月有老父投書于敦煌東門求之不獲書

曰涼王三十年若七年河西王牧犍以問奉常張慎對
曰昔虢之將亡神降于莘願殿下崇德修政以享三十
之祚若盤于遊畋荒于酒色臣恐七年將有大變牧犍
不悅

十四年冬十一月魏主以其妹武威公主妻河西王牧
犍河西王遣宋繇奉表詣平城謝且問其母及公主所
宜稱魏主使羣臣議之皆曰母以子貴妻從夫爵牧犍
母宜稱河西國太后公主於其國稱王后於京師則稱

公主魏主從之牧犍遣將軍沮渠旁周入貢于魏魏主遣侍中古弼尚書李順賜其侍臣衣服并徵世子封檀入侍是歲牧犍遣封檀如魏李順自河西還魏主問之曰卿往年言取涼州之策朕以東方有事未遑也今和龍已平吾欲即以此年西征可乎對曰臣疇昔所言以今觀之私謂不謬然國家戎車屢動士馬疲勞西征之議請俟它年魏主乃止

十六年春三月河西王牧犍通於其嫂李氏兄弟三人

傳嬖之李氏與牧犍之姊共毒魏公主魏主遣解毒醫
乘傳救之得愈魏主徵李氏牧犍不遣厚資給使居酒
泉魏每遣使者詣西域常詔牧犍發導護送出流沙使
者自西域還至武威牧犍左右有告魏使者曰我君承
蠕蠕可汗妄言云去歲魏天子自來伐我士馬疫死大
敗而還我擒其長弟樂平王丕我君大喜宣言於國又
聞可汗遣使告西域諸國稱魏已削弱今天下唯我為
彊若更有魏使勿復供奉西域諸國頗有貳心使還具

以狀聞魏遣尚書賀多羅使涼州觀虛實多羅還亦言
牧捷雖外修臣禮內實乖悖魏主欲討之以問崔浩對
曰牧捷逆心已露不可不誅官軍往年北伐雖不克獲
實無所損戰馬三十萬匹計在道死傷不滿八千常歲
羸死亦不減萬匹而遠方乘虛遽謂衰耗不能復振今
出其不意大軍猝至彼必駭擾不知所為擒之必矣魏
主曰善吾意亦以為然於是大集公卿議於西堂弘農
王奚斤等三十餘人皆曰牧捷西垂下國雖心不純臣

然繼父位以來職貢不乏朝廷待以藩臣妻以公主今其罪惡未彰宜加恕宥國家新征蠕蠕士馬疲弊未可大舉且聞其土地鹵瘠難得水草大軍既至彼必嬰城固守攻之不拔野無所掠此危道也初崔浩惡尚書李順順使涼州凡十二返魏主以為能涼武宣王數與順遊宴對其羣下時為驕慢之語恐順泄之隨以金寶納於順懷順亦為之隱浩知之密以白魏主魏主未之信及議伐涼州順與尚書古弼皆曰自溫圉水以西至姑

藏地皆枯石絕無水草彼人言姑臧城南天梯山上冬有積雪深至丈餘春夏消釋下流成川居民引以溉灌彼聞軍至決此渠口水必乏絕環城百里之內地不生草人馬飢渴難以久留斤等之議是也魏主乃命浩與斤等相詰難衆無復它言但云彼無水草浩曰漢書地理志稱涼州之畜為天下饒若無水草畜何以蕃又漢人終不於無水草之地築城郭建郡縣也且雪之消釋僅能斂塵何得通渠溉灌乎此言大為欺誣矣李順曰

耳聞不如目見吾嘗目見何可共辯崔浩曰汝受人金錢欲為之遊說謂我目不見便可欺邪帝隱聽聞之乃出見斤等辭色嚴厲羣臣不敢復言唯唯而已羣臣既出振威將軍代人伊馥言於帝曰涼州若果無水草彼何以為國衆議皆不可用宜從浩言帝善之夏五月丁丑魏主治兵於西郊六月甲辰發平城使侍中宜都王穆壽輔太子晃監國決留臺事內外聽焉又使大將軍長樂王嵇敬輔國大將軍建寧王崇將二萬人屯漢南

以備柔然命公卿為書以讓河西王牧犍數其十二罪
且曰若親帥羣臣委贄遠迎謁拜馬首上策也六軍既
臨面縛輿櫬其次也若守迷窮城不時悛悟身死族滅
為世大戮宜思厥中自求多福 魏主自雲中濟河秋
七月己巳至上郡屬國城壬午留輜重部分諸軍使撫
軍大將軍永昌王健尚書令劉絜與常山王素為前鋒
兩道並進驃騎大將軍樂平王丕太宰陽平王杜超為
後繼以平西將軍源賀為鄉導魏主問賀以取涼州方

略對曰姑臧城旁有四部鮮卑皆臣祖父舊民臣願處
軍前宣國威信示以禍福必相帥歸命外援既絕然後
取其孤城如反掌耳魏主曰善八月甲午永昌王健獲
河西畜產二十餘萬河西王牧犍聞有魏師驚曰何為
乃爾用左姚定國計不肯出迎求救於柔然遣其弟
征南大將軍董來將兵萬餘人出戰於城南望風奔潰
劉絜用卜者言以為日辰不利斂兵不追董來遂得入
城魏主由是怒之丙申魏主至姑臧遣使諭牧犍令出

降牧犍聞柔然欲入魏邊為寇冀幸魏主東還遂嬰城固守其兄子祖趯城出降魏主具知其情乃分軍圍之源賀引兵招慰諸部下三萬餘落故魏主得專攻姑臧無復外慮魏主見姑臧城外水草豐饒由是恨李順謂崔浩曰卿之昔言今果驗矣對曰臣之言不敢不實類皆如此魏主之伐涼州也太子晃亦以為疑至是魏主賜太子詔曰姑臧城東西門外涌泉合於城北其大如河自餘溝渠流入漠中其間乃無燥地故有此敕以釋

汝疑 九月丙戌河西王牧犍兄子萬年帥所領降魏
姑臧城潰牧犍帥其文武五千人面縛請降魏主釋其
縛而禮之收其城內戶口二十餘萬倉庫珍寶不可勝
計使張掖王禿髮保周龍驤將軍穆罷安遠將軍源賀
分徇諸郡雜胡降者又數十萬初牧犍以其弟無諱為
沙州刺史都督建康以西諸軍事領酒泉太守宜得為
秦州刺史都督丹嶺以西諸軍事領張掖太守安周為
樂都太守從弟唐兒為敦煌太守及姑臧破魏主遣鎮

南將軍代人奚眷擊張掖鎮北將軍封沓擊樂都宜得
燒倉庫西犇酒泉安周南奔吐谷渾封沓掠數千戶而
還奚眷進攻酒泉無諱宜得收遺民犇晉昌遂就唐兒
於敦煌魏主使弋陽公元絜守酒泉及武威張掖皆置
將守之魏主置酒姑臧謂羣臣曰崔公智略有餘吾不
復以為奇伊馥弓馬之士而所見乃與崔公同此深可
奇也冬十月辛酉魏主東還留樂平王丕及征西將軍
賀多羅鎮涼州徙沮渠牧犍宗族及吏民三萬戶于平

城 十二月壬午魏主至平城猶以妹壻待沮渠牧犍
尤喜文學以敦煌闕駟為姑臧太守張湛為兵部尚書
劉昞索敞陰興為國師助教金城宋欽為世子洗馬趙
柔為金部郎廣平程駿駿從弟弘為世子侍講魏主克
涼州皆禮而用之

十七年春正月己酉沮渠無諱寇魏酒泉元絜輕之出
城與語壬子無諱執絜以圍酒泉 三月沮渠無諱拔
酒泉 夏四月庚辰沮渠無諱寇魏張掖丙戌魏主遣

撫軍大將軍永昌王健督諸將討之 五月乙巳沮渠

無諱復圍張掖不克退保臨松魏主不復加討但以詔諭之 秋八月甲申沮渠無諱使其中尉梁偉詣魏永昌王健請降歸酒泉郡及所虜將士元絜等魏主使尉眷留鎮涼州

十八年春正月癸卯魏以沮渠無諱為征西大將軍涼州牧酒泉王 三月辛亥魏賜沮渠萬年為張掖王

夏四月沮渠唐兒叛沮渠無諱無諱留從弟天周守酒

泉與弟宜得引兵擊唐兒唐兒敗死魏以無諱終為邊
患庚辰遣鎮南將軍奚眷擊酒泉 冬十一月酒泉城
中食盡萬餘口皆餓死沮渠天周殺妻以食戰士庚子
魏奚眷拔酒泉獲天周送平城殺之沮渠無諱乏食且
畏魏兵之盛乃謀西度流沙遣其弟安周西擊鄯善鄯
善王欲降會魏使者至勸令拒守安周不能克退保東
城

十九年夏四月沮渠無諱將萬餘家棄敦煌西就沮渠

安周末至鄯善比龍畏之將其衆犇且末其世子降於
安周無諱遂據鄯善其士卒經流沙渴死者大半李寶
自伊吾帥衆二千入據敦煌繕修城府安集故民沮渠
牧犍之亡也涼州人闕爽據高昌自稱太守唐契為柔
然所逼據衆西趨高昌欲奪其地柔然遣其將阿若追
擊之契敗死契弟和收餘衆犇車師前部王伊洛時沮
渠安周屯橫截城和攻拔之又拔高寧白力二城遣使
請降於魏唐契之攻闕爽也爽遣使詐降於沮渠無

諱欲與之共擊契八月無諱將其衆趨高昌比至契已死爽閉門拒之九月無諱將衛興奴夜襲高昌屠其城爽奔柔然無諱據高昌遣其常侍泥雋奉表詣建康詔以無諱為都督涼河沙三州諸軍事征西大將軍河州刺史河西王

二十一年秋九月甲辰以沮渠安周為都督涼河沙三州諸軍事河州刺史河西王

二十四年魏師之克敦煌也沮渠牧犍使人所開府

庫取金玉及寶器因不復閉小民爭入盜取之有司索盜不獲至是牧犍所親及守藏者告之且言牧犍父子多蓄毒藥潛殺人前後以百數姊妹皆學左道有司索牧犍家得所匿物魏主大怒賜沮渠昭儀死并誅其宗族唯沮渠祖以先降得免又有告牧犍猶與故臣民交通謀反者三月魏主遣崔浩就第賜牧犍死諡曰哀王

魏平仇池

晉武帝太元十年冬十月西燕主沖遣尚書令高蓋帥

衆五萬伐後秦戰於新平蓋大敗降於後秦初蓋以楊
定為子及蓋敗定亡奔隴右復收集其舊衆定佛奴之
孫也十一月衛將軍楊定徙治厯城置儲蓄於百頃
自稱龍驤將軍仇池公遣使來稱藩詔因其所號假之
其後又取天水略陽之地自稱秦州刺史隴西王

十九年冬十月秦主崇為梁王乾歸所逐奔隴西王楊
定定與崇共攻乾歸乾歸遣涼州牧軻彈等拒之大敗
定兵殺定及崇定無子其叔父佛狗之子盛先守仇池

自稱征西將軍秦州刺史仇池公諡定為武王仍遣使來稱藩秦太子宣奔盛

二十一年冬十二月楊盛遣使來請命詔拜盛鎮南將軍仇池公盛表符宣為平北將軍

安帝隆安二年楊盛遣使附魏魏以盛為仇池王

義熙元年夏六月秦隴西公碩德伐仇池屢破楊盛兵秋七月楊盛請降于秦秦以盛為都督益寧二州諸軍事征南大將軍益州牧

三年夏四月氏王楊盛以平北將軍符宣為梁州督護將兵入漢中秦梁州別駕呂瑩等起兵應之刺史王敏攻之瑩等求援於盛盛遣軍臨湓口敏退屯武興盛復通於晉晉以盛為都督隴右諸軍事征西大將軍開府儀同三司盛因以宣行梁州刺史

八年冬十月仇池公楊盛叛秦侵擾祁山秦王興遣建威將軍趙琨為前鋒立節將軍姚伯壽繼之前將軍姚恢出驚峽秦州刺史姚嵩出羊頭峽右衛將軍胡翼度

出汧城以討盛興自雍赴之與諸將會於隴口天水太守王松忽言於嵩曰先帝神略無方徐洛生以英武佐命再入仇池無功而還非楊氏智勇能全也直地勢險固耳今以趙琨之衆使君之威準之先朝實未見成功使君具悉形便何不表聞嵩不從盛帥衆與琨相持伯壽畏懦不進琨衆寡不敵為盛所敗興斬伯壽而還

十二年夏六月氏王楊盛攻秦祁山拔之進逼秦州秦後將軍姚平救之盛引兵退平與上邽守將姚嵩追之

嵩與盛戰於竹嶺敗死

宋高祖永初三年夏四月乙亥詔封仇池公楊盛為武都王

文帝元嘉二年夏六月武都惠文王楊盛卒初盛聞晉亡不改義熙年號謂世子玄曰吾老矣當終為晉臣汝善事宋帝及盛卒玄自稱都督隴右諸軍事征西大將軍開府儀同三司秦州刺史武都王遣使來告喪始用元嘉年號

三年冬十月仇池氏楊興平求內附梁南秦二州刺史
吉翰遣始平太守龐詔據武興氏王楊玄遣其弟難當
將兵拒詔詔擊走之

四年秋九月氏王楊玄遣將軍符白作圍秦梁州刺史
出連輔政于赤水城中糧盡民執輔政以降輔政至駱
谷逃還冬十月秦以驍騎將軍吳漢為平南將軍梁州
刺史鎮南強冬十一月魏主遣軍司馬公孫軌兼大
鴻臚持節策拜楊玄為都督荆梁等四州諸軍事梁州

刺史南秦王及境玄不出迎軌責讓之欲奉策以還玄懼而郊迎

六年秋七月武都孝昭王楊玄疾病欲以國授其弟難當難當固辭請立玄子保宗而輔之玄許之玄卒保宗立難當妻姚氏勸難當自立難當乃廢保宗自稱都督雍涼秦三州諸軍事征西大將軍開府儀同三司秦州刺史武都王

七年夏六月己卯以氐王楊難當為冠軍將軍秦州刺

史武都王

九年夏六月加北秦州刺史楊難當征西將軍難當以
兄子保宗為鎮南將軍鎮宕昌以其子順為秦州刺史
守上邦保宗謀襲難當事泄難當囚之

十年夏四月帝聞梁南秦三州刺史甄灋護刑政不治
失氐羌之和乃自徒中起蕭思話為梁南秦二州刺史
灋護灋崇之兄也 秋九月戊午魏主遣兼大鴻臚崔
頤持節拜氐王楊難當為征南大將軍開府儀同三司

秦梁二州牧南秦王頤逞之子也 楊難當因蕭思話
未至甄灋護將下舉兵襲梁州破白馬獲晉昌太守張
範敗灋護參軍魯安期等又攻葭萌獲晉壽太守范延
朗 冬十一月丁未灋護棄城奔洋川之西城難當
遂有漢中之地以其司馬趙溫為梁秦二州刺史

十一年春正月楊難當以克漢中告捷於魏送雍州流
民七千家於長安蕭思話至襄陽遣橫野司馬蕭承之
為前驅承之緣道收兵得千人進據礪頭楊難當焚掠

漢中引衆西還留趙溫守梁州又遣其魏興太守薛健據黃金山思話遣陰平太守蕭坦攻鐵城戍拔之 二月趙溫薛健與其馮翊太守蒲甲子合攻坦營坦擊破之溫等退保西水臨川王義慶遣龍驤將軍裴方明將三千人助承之拔黃金戍而據之溫棄州城退據小城健甲子退保下桃城思話繼至與承之共擊趙溫等屢破之行參軍主靈濟別將出洋川攻南城拔之擒其守將趙英南城空無所資靈濟引兵還與承之合 三月楊

難當遣其子和將兵與蒲甲子等共擊蕭承之相拒四十餘日圍承之數十重短兵相接弓矢無所復施氏悉衣犀甲戈矛所不能入承之斷稍長數尺以大斧椎之一稍輒貫數人氏不能當燒營走據大桃閨月承之等追擊之至南城氏敗走斬獲甚衆悉收漢中故地置戍於葭萌水初桓希既敗氏王楊盛據漢中梁州刺史范元之傳歆皆治魏興唯得魏興上庸新城三郡及索邈為刺史乃治南城至是南城為氏所焚不可復固蕭思話

徙鎮南鄭 夏四月甄法護坐委鎮賜死于獄楊難當遣使奉表謝罪帝下詔赦之

十二年楊難當釋楊保宗之囚使鎮童亭

十三年春三月氏王楊難當自稱大秦王改元建義立妻為王后世子為太子置百官皆如天子之制然猶貢奉宋魏不絕 赫連定之西遷也楊難當遂據上邽秋七月魏主遣驃騎大將軍樂平王丕尚書令劉瓘督河西高平諸軍以討之先遣平東將軍崔贍齎詔書諭難

當 九月庚戌魏樂平王丕等至略陽楊難當懼請奉
詔攝上邽守兵還仇池諸將議以為不誅其豪帥軍還
之後必相聚為亂又大衆遠出不有所掠無以充軍實
賞將士丕將從之中書侍郎高允參丕軍事諫曰如諸
將之謀是傷其向化之心大軍既還為亂必速丕乃止
撫慰初附秋毫不犯秦隴遂安難當以其子順為雍州
刺史守下辯

十六年春三月楊保宗與兄保顯自童亭奔魏庚寅魏

主以保宗為都督隴西諸軍事征西大將軍開府儀同
三司秦州牧武都王鎮上邽妻以公主保顯為鎮西將
軍晉壽公 冬十二月氏王楊難當將兵數萬寇魏上
邽秦州人多應之東平呂羅漢說鎮將拓跋意頭曰難
當衆盛今不出戰示之以弱衆情離沮不可守也意頭
遣羅漢將精騎千餘出衝難當陳所向披靡殺其左右
騎八人難當大驚會魏主以璽書責讓難當難當引還
仇池

十七年大秦王楊難當復稱武都王

十八年冬十一月氐王楊難當傾國入寇謀據蜀土遣其建忠將軍符冲出東洛以禦涼州兵梁秦二州刺史劉真道擊冲斬之真道懷敬之子也難當攻拔葭萌獲晉壽太守申坦遂圍涪城巴西梓潼二郡太守劉道錫嬰城固守難當攻之十餘日不克乃還道錫道產之弟也十二月癸亥詔龍驤將軍裴方明等帥甲士三千人又發荆雍二州兵以討難當皆受劉真道節度

十九年夏五月裴方明等至漢中與劉真道分兵攻武興下辯白水皆取之楊難當遣建節將軍符弘祖守蘭臯使其子撫軍大將軍和將重兵為後繼方明與弘祖戰於濁水大破之斬弘祖和退走追至赤亭又破之難當奔上邽獲難當兄子建節將軍保熾難當以其子虎為益州刺史守陰平聞難當走引兵還至下辯方明使其子肅之邀擊之擒虎送建康斬之仇池平以輔國司馬胡崇之為北秦州刺史鎮其地立楊保熾為楊玄後

使守仇池魏人遣中山王辰迎楊難當詣平城秋七月
以劉真道為雍州刺史裴方明為梁南秦二州刺史方
明辭不拜丙寅魏主使安西將軍古弼督隴右諸軍及
殿中虎賁與武都王楊保宗自祁山南入征西將軍漁
陽皮豹子與琅邪王司馬楚之督關中諸軍自散關西
入俱會仇池又使譙王司馬文思督洛豫諸軍南趨襄
陽征南將軍刁雍東趨廣陵移書徐州稱為楊難當報
仇

二十年春正月魏皮豹子等進擊樂鄉將軍王真之等
敗沒魏軍進至下辯將軍強玄明等敗死 二月胡崇
之與魏戰于濁水崇之為魏所擒餘衆走還漢中將軍
姜道祖兵敗降魏魏遂取仇池楊保熾走 魏河間公
齊與武都王楊保宗對鎮維谷保宗弟文德說保宗令
閉險自固以叛魏或以告齊夏四月齊誘執保宗送平
城殺之前鎮東司馬符達征西從事中郎任肅等遂舉
兵立楊文德為主據白崖分兵取諸戎進圍仇池自號


征西將軍秦河梁二州牧仇池公 夏五月魏古弼發
上邽高平岼城諸軍擊楊文德文德退走皮豹子督關
中諸軍至下辯聞仇池解圍欲還弼遣人謂豹子曰宋
人恥敗必將復來軍還之後再舉為難不如練兵蓄力
以待之不出秋冬宋師必至以逸待勞無不克矣豹子
從之魏以豹子為仇池鎮將楊文德遣使來求援秋七
月癸丑詔以文德為都督北秦雍二州諸軍事征西大
將軍北秦州刺史武都王文德屯葭蘆城以任詘為左

司馬武都陰平氏多歸之 甲子前雍州刺史劉真道
梁南秦州刺史裴方明坐破仇池減匿金寶及善馬下
獄死 冬十一月將軍姜道盛與楊文德合衆二萬攻
魏濁水城魏皮豹子河間公齊救之道盛敗死

二十四年冬十二月楊文德據葭蘆城招誘氏羌武都
等五郡氏皆應之

二十五年春正月魏仇池鎮將皮豹子帥諸軍擊之文
德兵敗棄城奔漢中豹子收其妻子僚屬軍資及楊保

宗所尚魏公主而還初保宗將叛公主勸之或曰奈何
叛父母之國公主曰事成爲一國之母豈比小縣公主
哉魏主賜之死楊文德坐失守免官削爵土



通鑑紀事本末卷十八下